



## ШЫҒЫН БЮДЖЕТ ПЕН БИЗНЕСТІҢ ЕСЕБІНЕН ӨТЕЛЕДІ

Елімізде алапат су тасқынының шығыны есептеліп жатыр. Зардап шеккен азаматтардың жоғалтқан дүние-мүлкі түгенделіп, өтелуі тиіс. Атқарушы билік бұл жұмыстарды Мемлекет басшысы Қасым-Жомарт Тоқаевтың тапсырмасы бойынша жүргізуде. Қарғын судан зардап шеккен облыстарда арнайы комиссиялар құрылды.



20 сәуірдегі жағдай бойынша 8 814 отбасы жалпы сомасы 3,2 млрд теңге болатын 100 АЕК көлеміндегі біржолғы төлемді алды. Қазір зардап шеккен өңірлерде 3 210 тұрғын үй тексеріліп, олардың 1 969-ына бағалау жүргізілді. Оның ішінде 311 үйде жөндеу жұмыстарын жүргізу үшін 447 млн

теңгеден астам қаржы бөлінген. 35 отбасына ескі үйдің орнына жаңа баспана мен пәтерлер берілді. Ал мал шығыны үшін берілген өтемақының жалпы сомасы 89 млн теңгеге жетті.

4»

### ӘЛЕУМЕТТІК МАҢЫЗЫ БАР ӨНІМДЕР АРЗАНДАДЫ

Үкіметте вице-премьер Серік Жұманғариннің төрағалығымен өткен кеңесте әлеуметтік маңызы бар азық-түлік тауарлары (ӘМАТ) бағасының қарқыны мен өңірлердегі азық-түлік қорларының сақталу мәселелері талқыланды.



4  
БЕТ

### ҚАЗАҚТЫҢ САДАҚШЫ ҚЫЗЫ – КАЯ

Садақ атудан Қазақстанның үш дүркін чемпионы, Дәстүрлі садақ ату бойынша республика құрамасының мүшесі, Қарағанды қаласындағы «Қайрат» ұлттық ат спорты мектебінің жаттықтырушысы Кая Мазнева – садақшы қыздарымыздың көшін бастаушылардың бірі.



6  
БЕТ

## СӘУІРДЕГІ СӘРУӘР КІТАП КӨРМЕСІ

Астаналық оқырман қауым көктемнің жайма-шуағымен қатар ақыл-білімнің кеңі саналған кітаптың да шұғыласын сезіне білді. 17-21 сәуір аралығында Конгресс орталығында Astana Eurasian Book Fair – 2024 VII Халықаралық кітап көрме-жәрмеңкесі өтті.



«Фолиант» баспасының кезекті дәстүрлі шарасының салтанатты ашылу рәсіміне белгілі мемлекет және қоғам қайраткерлері, акын-жазушылар, шет мемлекеттердің елшілері қатысты. Бес күнге созылған Халықаралық кітап көрме-жәрмеңкесі ересектерге де, балаларға да бірдей қызықты болатын мәдени-іскерлік бағдарламамен көмкерілді. Биылғы кітап көрмесіне Қазақстаннан бөлек әлемнің түкпір-түкпірінен баспагерлер мен кітап дүкендері катысып, өз өнімдерін ұсынды. Келушілердің қызығушылығын арттыру үшін әртүрлі алаң әзірленген екен. Әртүрлі кітаптың тұсаукесері мен акын-жазушымен кездесу шаралары өтті. Осы ретте біз «Фолиант» баспасының бас редакторы Фарида Тобашаловадан биылғы шараның артықшылықтары мен ерекшеліктерін сұрадық.

8»



## ОЙЫНҚҰМАРЛЫҚ – ЕЛ ҚАУІПСІЗДІГІНЕ ҚАТЕР

Кеше Мәжіліс Спикері Ерлан Қошановтың төрағалығымен жалпы отырыс өтті. Онда депутаттар ойын бизнесі, лотереялар және лотерея қызметі туралы заң жобасы мен оған ілеспе түзетулерді бірінші оқылымда мақұлдады. Сондай-ақ жаңартылатын энергия көздерін пайдалануды қолдау және электр энергетикасы мәселелері туралы заңды екінші оқылымда қабылдады. Бұдан бөлек, Әкімшілік құқық бұзушылық туралы кодекске масс-медиа мәселелері бойынша енгізілетін түзетулер екі оқылымда қабылданды.

Ойын бизнесі, лотереялар және лотерея қызметі мәселелері бойынша заңнамалық өзгерістер мен Әкімшілік құқық бұзушылық туралы кодекске енгізілетін ілеспе түзетулерді депутаттар Мемлекет басшысының құмар ойындарға тәуелділікке қарсы күресті күшейту туралы тапсырмасы аясында әзірледі. Кеше заң жобалары бірінші оқылымда мақұлданды. Жұмыс тобының жетекшісі Елнұр Бейсенбаев құмар ойынға тәуелділікпен күресу қоғам үшін өзекті мәселе екенін атап өтті.

«Қазақстанда ойынқұмарлық індеттей өршіп, ел қауіпсіздігіне қатер төндіре бастағанын байқаймыз. Сондықтан мұндай жағдайға әкелетін себептерді жойып, қоғамды бұл дерттен сауықтыру үшін шұғыл ша-

рлар қабылдау қажет. Бүгін қарастырылған заң жобалары осы мәселені барынша ауыздықтап, реттеуге арналған», – деді ол.

Депутат заң жобасында букмекерлік кеңселер мен казинолардың жарнамасын шектеу қарастырылғанын айтты. Үйлерде, ғимараттарда, құрылыстардың қоршауларында, көліктерде сыртқы жарнама орналастыруға тыйым салынады. Интернет ресурстарында, ресми сайттарда, телеарналар мен радио, мерзімді баспа басылымдарында, кинода, мобильді операторлардың SMS хабарламаларында да жарнамаға толық тыйым салынады. Бұл тыйым әлеуметтік желідегі блогерлерге де қатысты.

(Жалғасы 2-бетте)

## ІНДЕТ ҚАУІПІ БАР МА?

Биылғы көктемгі тасқын елді біраз әбігерге салып тұрғаны рас. Кейбір ауылдарда тұрғындардың малы мен мүлкі түгел суға кетті. Тіпті, ең даланы еркін көзген киіктің мыңға жуығы жайылған судың арнасын кесіп өте алмай, суға тұншықты. Қазір сол өлекселерді түгел жинап алу мүмкін болмай тұр. Егер өлекселер дер кезінде жиналып алынбаса, түрлі инфекциялық ауру тарату қаупі төнуі ықтимал. Бірақатар сарапшылардың пікірі осыған саяды.



Су тасқынының зардабын есептеп, түгел шығынды қалпына келтіру жұмыстары қазірдің өзінде жүзеге асырыла бастады. Кей өңірлерде халық үйлеріне қайта оралып жатса, енді бірі мемлекет ұсынған баспаналарының кілтін алуға. Кеткен шығынның есебі жүргізілуде.

Бірақ су басқан өңірлерден инфекция таралу қаупі бар екені жасырын емес. Мемлекет бұл жағдайға қаншалықты дайын? Түрлі ақпарат агенттіктері мен әлеуметтік желілер су басқан өңірлерде аса қауіпті сибір жарасының ошақтары бар екенін айтып шулаған еді.

Елдің енжарлық танытпай, мәселеге ерекше көңіл аударуында үлкен мән бар. Себебі Ауыл шаруашылығы министрлігі мамандары ресми түрде елімізде аса қауіпті сибір жарасының 10 ошағы қарғын судың астында қалғанын мәлімдеді. Одан бөлек, су жайылған аймақтарда түрлі кәріздер мен өзге де эпидемиологиялық қауіп бар орындар, тіпті ескі қорым-молалардың болуы жағдайдың жақсы болмай тұрғанын аңғартады. Ең басты мәселе сол, кезінде аса қауіпті болған жұқпалы инфекциялық аурулардың таралып кетпеуін бақылауда ұстау болып отыр.

5»













